

FILIMONI

Faulo yana kiluma Filimoni 'waineye.

Filimoni tomogo 'ai'aiwabuna, wata taunina tovetumagana 'awalawa Kolose 'waineye. Filimoninina tamu tomogo i 'ewai yana tofolova-maimaiga 'ana wagava Onesimo mulieta i dega 'ana toveimeanina 'wainega. I dega i nunagoga Faulo i velugai tutuyanina i miamia vanuga 'eba yogona 'waineye. Faulo yana veifufu 'wainega Onesimo i nuavilai Iesu Keliso 'waineye.

Faulo wata Onesimo taiadi i miamia nuanuana Onesimo i na vevilai bega de'e letanina i kilumi Filimoni faifaina. Letanina nageneye Faulo Filimoni i vonevoneni nuanuana Onesimo i na lu'uma'umaieni ma yana sosoana. I na lu'uma'umaieniga kebu yana tofolova-maimaiga faifaina siwe fai ma fuedie i vetumagana Iesu Keliso 'waineye faifaina. De'e letanina 'ana 'idi side bani'odi.

Faulo yana vekaiwa Filimoni 'waineye. 1:1-3

Faulo i vekaiwa Yaubada 'waineye Filimoni faifaina. 1:4-7

Faulo nuanuana Filimoni Onesimo i na sosoaneni. 1:8-22

Faulo yana 'alanuai. 1:23-25

¹Yau Faulo iada Timoti taiadi, 'a vevekaiwa iama Filimoni 'waimuye. 'Omu wata 'ima ma fueda ta lulu'ivona Iesu Keliso Valana 'Atumaina faifaina, begaidi yau i yatoku a miamia vanuga 'eba yogona 'waineye.

²Wata yama vekaiwa i viwai Iesu 'ana tovetumaganavo 'waidie, kumanidiavo taiadi 'wa mimiava'auta yamu vanuge, Afia kumanidi 'a awave-novunediga wata Akifasi. Taunina ma fueda ta vetolugavia Iesu Keliso faifaina. ³'A vevelu'ui faifaimi, nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie wata nuanua bikana mia 'atumaina taiadi i na vevelemi.

Filimoni yana nuakalikali wata yana vetumagana faifaidi.

4-5^aValamu a nogai 'u vevetumagana 'ada Toveimea Iesu 'waineye wata Yaubada yana tomotoga 'u nunuakalikali, begaidi tutuyanina a vevelu'ui Yaubada 'waineye a nuanuanimu wata a vevekaiwa 'waineye faifaimu. 6^bA vevelu'ui faifaimu, nuanuaku Yaubada yana 'aivaita 'wainega tutuya fue di yamu vetumagana Iesu Keliso 'waineye 'u na lulu'ivona tomotoga 'waidie, bega naninidi 'atumaidi ta veveluagadiga fai 'ida Keliso yana tomotoga, 'u na 'aseta-'atumaidi. 7Iaku, 'eba sosoana bwaikina wata 'eba 'aivaita mogitana 'waikuye fai 'u nunuakalikali bwaikina, we'e yamu veifufu 'waidiega Yaubada yana tomotoga 'u kiavefa'alidi wata 'u kiavesosoanidi.

Faulo yana velu'ase'ase Onesimo faifaina.

8-9Yaubada yana tomotoga 'u nunuakalikaliyedi begaidi a na vonemu. Yau Faulo, Iesu Keliso faifaina a vetomata'aulele a lulu'ivoneyeni vanuga 'eba yogona 'waineye i yatoku a miamia, ma yaku veimea Keliso 'wainega bega 'aku fata a da lukakademuga yaku nuanua 'u da 'idewai, siwe fai 'omu iaku, nuakalikaliyedi a na vonemumo bega ava'ai sauluvaga 'atumaina, nuanuaku 'u na 'idewai. 10^cNuanuaku a na vonemu Onesimo faifaina, de'e bei vanuga 'eba yogona 'waineye a miamia yaku veifufu 'wainega i vetumagana Keliso 'waineye bega a awave-natuna 'waineye. 11Basenadi Onesimo yamu tofolova-maimaiga, 'omu 'aisemu 'u veimea-'ea'ea 'waineye, yana folova kebu 'atumainaga i dega 'waimuyega. I maiga a veluagai bega tutuya de'e tomogo 'atumaina 'waideye, 'omu wata yau 'ada to'aivaita.

12-13A nuakalikaliyeni bwaikina igodi a da ve'o'oleni. Yau a miamia vanuga 'eba yogona 'waineye fai Iesu Valana 'Atumaina a lalau'age, we'e Onesimo tutulimu i da 'i'ivaiseku, siwe 'omu yamu tofolova bega a voneni i na vilai i na wai. 14^d'Ai'edi 'u na vo, Onesimo a na vevilai i na nago Faulo i na 'i'ivaiseni," 'atumaina, siwe kebu a na lukakademuga, 'ai'edi nuanuamu taunimu yamu nuanuayega 'u na vetunei. 'Ai'edi kebu, 'asa'aiana.

15I 'iawemuga voke tutuya 'ale'usana faifaina, bega tutuya de'e taiadi 'wa na mia-vagata. 16Mogitana yamu tofolova, siwe 'asiau kebu tofolova 'aisena, taunina tamu tomogo, fai ma fueda ta vetumagana Keliso 'waineye bega ta na awave-taineni. Yau a nuakalikaliyeni, 'omu wata bani'odi 'u na nuakalikaliyeni bwaikina fai ma fuemie 'ada Toveimea Iesu yana tomotoga bega i na 'i'ivaisemu yamu folova 'waidie.

17'Ai'edi 'omu 'aku 'au taiadi ta folofolova Iesu faifaina, 'u na nuanina bega Onesimo i na waiga 'waimuye ma yamu sosoana 'u na

a 1:4 Lom 1:8-9 b 1:6 Kol 1:9 c 1:10 Kol 4:9 d 1:14 2 Kol 9:7

lu'uma'umaieni 'wa da vo yau a da le'wa 'waimuye 'u da lu'uma'umaieku.
 18 We'e 'ai'edi tamu ava'ai sakoina basenadi i 'idewaiga 'waimuye, 'alo
 tamu nani i 'ewa-maimaigi 'u na voneku a na tutuli. 19^eYau Faulo, de'e a
 kilukiluma nimakuyega, 'u na 'isa'innanai 'u na 'asetai mogitana yau, bega
 a vona'awaufaufa 'waimuye 'ai'edi ava'ai Onesimo i 'ewa-maimaigiga
 'waimuyega, matatabuna yau a na tutulidi. Siwe 'u na nuani basenadi
 yaku vona 'wainega 'u vetumagana Keliso 'waineye mia 'atumaina wata
 miamia-vagaina 'u veluagai, 'ako 'u da vo, A na tutuli," kebu 'amu fataga.
 20 Begaidi nuanuaku 'u na vesauluva 'atumaina 'waikuye 'ada Toveimea
 Iesu faifaina. 'Omu bani'odi taiku fai ta vetumagana Keliso 'waineye
 bega 'ai'edi yaku nuanuananina 'u na 'idewaiga, 'u na kiavesosoaniku.
 21 A 'asetai mogitana 'ai'edi ava'ai nuanuaku faifaina a na kiluma
 'waimuye 'ana fata 'u na 'idewai, siwe kebu naninina 'aisena, nani
 'ifwaidi wata 'atumaidi taiadi.

22^fWata tamu yaku nuanua, nuanuaku yamu vanuge yaku 'eba 'eno 'u
 na 'idewai, fai a nuani mogitana yami velu'ui 'waidiega Yaubada bonami
 i na ngai bega i na 'etoyavuku vanuga 'eba yogona 'wainega a na wai.

'Alanuai.

23^gEfabila, taunina wata Iesu Keliso faifaina i lulu'ivona bega ma
 fuemeye 'a miamia vanuga 'eba yogona 'waineye, yana vekaiwa i vetunei
 'waimie. 24^hWata 'ifwaidi tomotoga yadi vekaiwa 'waimie, taunidi 'aku
 to'aivaita taiadi 'a folofolova, Malika, Alisitako, Dimasi wata Luke.

25 A vevelu'ui faifaimi, nuanuaku 'ada Toveimea Iesu Keliso ma yana
 nuakalikali i na vevesauluva 'atumaina 'waimie.

'Asa'iana bani'odi,
 Yau Faulo.